



Aningaasaqarnermut Naalakkersuisoq

TUAVIORTOQ

Ataasinngornermi ulloq 20. december Aningaasaqarnermut Ataatsimiititaliap aalajangiinera pillugi Naalakkersuisunut ilisimatitsissut – Suliaq nr. 01.31.06/10-00509

B2171, Imaneq 27-mi oqoqarnerata kingunerisaanik ilassutitut aningaasaliissutissanik qinnuteqarneq

Naalakkersuisut **inassutigaaat,**

- Kontumi pingaarnermi 20.30.10-mi, Namminersorlutik Oqartussat Nuummi qitiusumik allaffeqarfinnut tunngasumi, aningaasaliissutit 1.263.000 kr.-inik amerlineqassasut,
- Kontumi pingaarnermi 20.11.50-imi, Ingerlatsineranut sillimatinut tunngasumi, aningaasaliissutit 1.263.000 kr.-inik ikilineqassasut.

Aningaasaqarnermut Ataatsimiititaliap oqaaseqaatai

Aningaasaqarnermut Ataatsimiititaliap ulloq 3. december 2010 ataatsimiinnermini suliassami matumani isummernissaa kinguartippaa apeqqutitut assigiinngitsunut Naalakkersuisut akissutaasa utaqqinneqarnissaa siunertaralugu.

Naalakkersuisut akissutaat tunngavigalugit Ataatsimiititaliap suliassami matumani qinnuteqaat akuerisinnaavaa.

Ataatsimiititaliap naliliinnermini Naalakkersuisut inatsisilerinikkut naliliisitsisimanerat immikkut pingaartippaa. Taamaalilluni ataatsimiititaliap maluginiarpaa inatsisilerinikkut naliliinnermi takuneqarsinnaammat suliassami matumani pineqartumi oqoqarnerata paasineqarnerata kingorna illuutip iluatungaata nutarterneqarneranut aningaasartuutitut B-2171-imik attartortitsisup akiliisinneqarsinnaanera ajornartutut isigineqarmat.

Ataatsimiititaliap suliassami pineqartumi matumani suliamik ingerlatsisimaneq eqqarsarnartoqartippaa. Suliaq manna Naalakkersuisunik pissutissaqalersitsisariaqaraluarpoq siumut isigisumik allaffissornikkut suleriaatsinik qularnaarinninnissamat, illuutitik Namminersorlutik Oqartussat attartugaannik attartortitsisut ileqquliussamik peqataatinneqartalersillugit aserfallatsaaliilluni suliassat mikinerusunut (annerusulluunniit) aallartinneqannginnerini. Taamaaliornikkut pinngitsoortinneqarsinnaagaluarpoq Namminersorlutik Oqartussat attartortitsisup siumut akuereriinngisaanik aserfallatsaalilluni suliassanik aallartitsinerni attartortutut pisinnaatitaaffimminik periarfissaminillu killiliisarnerat. Taamatut suliassanik aallartitsinnginnermi najoqqutassaqaanikkut ilanngullugu qularnaarneqassaaq, siunissami suliassat taamaattut pinngitsoortinneqarsinnaaqullugit, illuutit attartukkat eqqarsaatigalugit ajornartorsiutit qanoq suliarineqartarnissaat eqqarsaatigalugu Namminersorlutik Oqartussani namminermi suleriaatsit akisussaaffiillu pisariaqartumik erseqqissarneqarnissaat.

Aningaasaqarnermut Ataatsimiititaliap aalajangenera

Aningaasaqarnermut Ataatsimiititaliap qulaani allassimasutut paasinnilluni Naalakkersuisut inassuteqaataat **akuerai**.

Aningaasaqarnermut Ataatsimiititaliap sinnerlugu

Naaja Nathanielsen

Aningaasaqarnermut Ataatsimiititaliap siulittaasua